

明史藁

列傳第二百三

光祿大夫 經筵講官明史總裁戶部尚書加七級鑲藍鴻緒奉
敕編撰

西域二

西寧河州洮州岷州諸衛蕃族 安定衛

阿端衛 曲先衛 赤斤蒙古衛

沙州衛 罕東衛 罕東左衛

哈梅里

西番卽西羌族種最多自陝西歷四川雲南西徼外皆是其
散處河湟洮岷間者爲中國患尤劇漢趙充國張奐段熲唐
哥舒翰宋王韶之所經營皆此地也元封駙馬章古爲寧漢

郡王鎮西寧而於河州設吐蕃宣慰司以洮岷黎雅諸州隸之統治番衆洪武二年太祖定陝西卽遣官齎詔招諭其酋長皆觀望復遣員外郎許允德招之乃多聽命明年五月吐蕃宣慰使司鎮南普等以元所授金銀牌印宣敕來上會鄧愈克河州遂詣軍前降其鎮西武靖王卜納剌亦以吐蕃諸部來納款其冬鎮南普等入朝貢馬及方物帝喜賜襲衣四年正月設河州衛命爲指揮同知予世襲知院朵兒只汪家奴並爲指揮僉事設千戶所八百戶所七皆命其酋長爲之卜納剌等亦至京命爲靖南衛指揮同知其儕桑加朵兒只爲高昌衛指揮同知皆帶刀侍衛自是番酋日至尋以降人馬梅汪瓦兒並爲河州衛指揮僉事又遣西寧州同知李順

哥等招撫其酋長至者亦悉授官乃改西寧州爲衛以喃哥爲指揮帝以西番產馬與之互市馬至漸多而其所用之貨與中國異自更鈔法後馬至者少惠之八年五月命中官趙成齋羅綺綾絹并巴茶往河州市之馬稍集率厚其直以償成又宣諭德意番人感悅相率詣闕謝恩而山後歸德等州西番諸部落皆以馬來市矣十二年以洮州十八族番酋三副使等叛據納麟七站之地命征西將軍沐英等討之又命李文忠往籌軍事英等至洮州舊城寇遁去追斬其魁數人盡獲畜產遂於東籠山南川度地築城置戍遣使來奏帝報曰洮州西番門戶築城戍守是扼其咽喉矣遂置洮州衛以指揮聶緯陳暉等六人守之旣而文忠等言官軍守洮州向

艱民勞帝降敕諭之曰洮州西控番戎東蔽隴漢唐以來
備邊要地也今番寇既斥棄之不守數年之後番人將復爲
患慮小費而忘大虞豈良策哉所獲牛羊分給將士亦足充
兩年軍食其如敕行之文忠等乃不敢違是年秋鎖南普及
鎮撫劉溫各攜家屬來朝諭中書省臣曰鎖南普自歸附以
來信義甚堅前遣使烏斯藏遠涉萬里及歸所言皆稱朕意
今以家屬來朝宜加禮待乃賜米麥各三十石劉溫三之一
英等進擊番寇大破之盡擒其魁俘斬數萬人獲馬牛羊數
十萬自是羣番震懼不敢爲寇十六年青海酋長史刺巴等
七人來歸賜文綺寶鈔是時岷州亦設衛番人歲以馬易茶
馬日蕃息二十五年又命中官而聶至河州召必里諸蕃族

以敕諭之爭出馬以獻得萬三百餘匹給茶三十餘萬斤命以馬昇河南山東陝西騎士帝以諸衛將士有擅索番人馬者遣官齎金銅信符敕諭往賜涼州甘州肅州永昌山丹臨洮鞏昌西寧洮州河州岷州諸番族諭之曰往者朝廷有所需於爾必酬以茶貨未嘗暴有徵求近聞邊將無狀多假朝命擾害俾爾等不獲寧居今特製金銅信符頒給遇有徵發必比對相符始行否則僞械至京師罪之自是需求遂絕初西寧番僧三刺爲書招降罕東諸部又建佛刹於碾白南川以居其衆至是來朝貢馬請敕護持賜寺額帝從所請賜額曰瞿曇寺因立西寧僧綱司以三刺爲都綱又立河州番漢二僧綱司並以番僧爲之給以符契自是其徒爭建寺帝輒

錫以嘉名且賜護持敕以故番僧來者日衆永樂時諸衛僧
戒行精勤者多授刺麻禪師灌頂國師之號有加至大國師
西天佛子者悉給以印誥許之世襲且令其歲一朝貢由是
諸僧及諸衛土官輻輳京師其他族種如西寧十三簇岷州
十八簇洮州十八簇之屬大者數千人少者數百亦許其歲
一奉貢優以宴賚西番之勢益分其力益弱西陲之患亦益
寡宣德元年以協討安定曲先功加國師吒思巴領占等五
人爲大國師給誥命銀印秩正四品加刺麻著星等六人爲
禪師給敕命銀印秩正六品正統五年勅陝西鎮守都督鄭
銘都御史陳鑑曰得奏言河州番民領占等先因避罪逃居
結河里招集徒黨占耕土田不注籍納賦又藏匿逃亾剽劫

行旅欲發兵討之朕念番性頑梗且所犯在赦前若遽加師
旅恐累及無辜宜使人撫諭令散遣徒黨還所掠牛羊兵卽
勿進否則加兵未晚爾等其審之番人果輸服七年再敕銘
及都御史王翱等曰得鎮守河州都指揮劉永奏往歲阿爾
官等六簇三千餘人列營歸德城下聲言交易後乃鈔掠屯
軍大肆焚戮而著亦匝簇番人屢於煖泉亭諸處潛爲寇盜
指揮張瑀擒獲二人止責償所盜馬縱之使去論法瑀及永
皆當究治今姑令戴罪爾等卽遣官偕三司堂上親詣其寨
曉以利害令還歸所掠許其自新不悛則進討蓋馭戎之道
撫綏爲先撫之不從然後用兵爾等宜體此意番人亦輸服
成化三年陝西副使鄭安言進貢番僧自烏斯藏來者不過

三之一餘皆洮岷寺僧詭名冒貢進一羸馬輒獲厚直得所
賜幣帛製爲戰袍以拒官軍本以羈縻之而益致寇掠是虛
國帑而齎盜糧也章下禮部會廷臣議請行陝西文武諸臣
計定貢期人數及存留起送之額以聞報可已而奏上諸自
烏斯藏來者皆由四川入不得徑赴洮岷遂著爲例明年冬
洮州番寇擁衆掠鐵成後川二寨指揮張翰等率兵禦之敗
去獲所掠人口以歸五年巡按江孟綸言岷州番寇縱橫村
堡爲虛頃令指揮后泰與其弟通深入番寨反覆開示生番
忍藏占藏等三十餘簇酋長百六十餘人熟番栗林等二十
四簇酋長九十一人轉相告語悔過來歸且還我被掠人畜
願供徭賦殺牛告天誓不再犯已令副使李玘從宜賞勞宣

示朝廷恩威皆歡躍而去惟熟番祿園一簇怙惡不服兵部
言番性無常朝撫夕叛未可弛備請諭邊臣向化者加意撫
綏犯順者克期勦滅帝納其言八年禮官言洮岷諸衛送各
簇番人赴京多至四千二百餘人應賞綵幣人二表裏帛如
之鈔二十九萬八千有奇馬直尚在其外考正統天順間各
番貢使不過三五百人成化初因洮岷諸處濫以熟番作生
番冒送已定例生番三年一貢大簇四五人小簇一二人赴
京餘悉遣還成化六年副使鄧本瑞妄自招徠又復冒送臣
部已重申約束今副使吳玘等不能嚴飭武備專事通番以
紓近患乞降敕切責務遵前令帝亦如其言西寧卽古湟中
其西四百里有青海又曰西海水草豐美番人環居之專務

畜牧日益繁滋素號樂土正德四年蒙古部酋亦不剌阿爾
禿廝獲罪其主擁衆西奔瞰知青海饒富襲而據之大肆焚
掠番人失其地多遠徙其留者不能自存反爲所役屬自是
甘肅西寧始有海寇之患九年總制彭澤集諸道軍將擣其
巢寇訶知之由河州渡黃河奔四川出松潘茂州境直走烏
斯藏及大軍引還則仍返海上惟阿爾禿廝遁去嘉靖二年
尚書金獻民西征議遣官招撫許爲藩臣如先朝設安定曲
先諸衛故事兵部行總制楊一清計度一清意在征討言寇
精騎不過二三千餘皆脇從番人然怨之人骨時欲報讐可
用爲間諜大舉勦絕議未定王憲王瓊相繼來代皆以兵寡
餉拙議竟不行八年洮岷諸番數犯臨洮鞏昌內地騷動樞

臣李承勲言番爲海寇所侵日益內徙倘二寇交通何以善
後昔趙充國不戰而服羌段熲殺羌百萬而內地虛耗兩者
相去遠矣乞廣先帝之明專充國之任制置方畧悉聽瓊便
宜從事瓊乃集衆議且勦且撫先遣總兵官劉文遊擊彭械
分布士馬明年二月自固原進至洮岷遣人開示禍福洮州
東路木舍等三十一族西路荅祿失等十三族岷州西寧溝
等十五族皆聽撫給白旂犒賜遣歸惟岷州東路若籠族西
路板爾等十五族及岷州刺卽等五族恃險不服乃分兵先
攻若籠板爾二族覆其巢刺卽諸族震懼乞降凡斬首三百
六十餘級撫定七十餘族乃班師自是洮岷獲寧而西寧仍
苦寇患十一年甘肅巡撫趙載等言亦不刺據海上已二十

餘年其黨卜兒孩獨傾心向化求帖木哥等屬番來納款宜因而撫之或俾之納馬或令其遣質或授官給印建立衛所爲我藩籬於計爲便疏甫上會河套酋吉囊引衆西掠大破亦不剌營收其部落大半而去惟卜兒孩一枝斂衆自保獲全由是西寧亦獲休息而納款之議竟寢及唐龍爲總制而寇南掠松潘龍慮其回巢與諸番及他部勾結爲患奏行甘肅守臣繕兵積粟爲殄滅計及龍去事亦不行二十年正月卜兒孩獻金牌良馬求款兵部言寇果輸誠通貢誠西陲大利乃止獻馬及金牌未有如往歲遣子入侍酋長入朝之請未可遽許宜令督撫臣偵察情實并條制馭之策以聞報可會寇勢漸衰番人亦漸復業其議復寢二十四年設岷州隸

鞏昌府岷西臨極邊番漢雜處洪武時改土番十六族爲十六里設衛治之俾稍供徭役自設州之後徵發繁重人日困敝且番人戀世官而流官又不樂居遙寄治他所越十餘年督撫合疏言不便乃設衛如故時北部俺荅猖獗旣歲掠宣大諸鎮又羨青海富饒三十八年攜子賓兔丙兔等數萬衆襲據其地卜兒孩竄走遂縱掠諸番已而引去留賓兔據松山丙兔據青海西寧亦被其患隆慶中俺荅受封順義王修貢惟謹二子亦斂戢時烏斯藏僧有稱活佛者諸部多奉其教丙兔乃以焚修爲名請建寺青海及嘉峪關外爲久居計廷臣多言不可許禮官言彼已採木興工而令改建於他所勢所不能莫若因而許之以鼓動其善心而杜其關外之請

況中國之禦戎惟在邊關之有備戎之順逆亦不在一寺之遠近帝乃許之丙兔旣得請又近脅番人使通道松潘以迎活佛四川守臣懼逼乞令俺荅約束其子毋擾鄰境俺荅言丙兔止因甘肅不許開市寧夏又道遠艱難雖有禁令不能盡制宣大總督方逢時亦言開市爲便帝以責陝西督撫督撫不敢違萬曆二年冬許丙兔市於甘肅賓兔市於莊浪歲一次旣而寺成俺荅請賜額帝名之曰仰華先是亦不刺之據青海邊臣猶以外寇視之至是以俺荅故竟視之若屬番諸酋亦以父受王封不敢大爲邊患而洮州之變乃起初洮州番人以河州奸民負其物貨入掠內地他族亦乘機爲亂奸民以告河州參將陳堂堂曰此洮州番也何與我事洮州

參將劉文英曰彼犯河州非我失事由是二將有隙總督石茂華聞之令二人及蘭州參將徐勲岷州守備朱憲舊洮州操守史經各引兵壓其境而遣人曉以利害番人懼卽還所掠人畜世英謂首惡未擒不可但已進兵勦破之殺傷及焚死者無筭軍律吹銅角乃退兵堂挾前憾不待角聲而去諸部亦多引去憲經方深入搜捕鄰番見其勢孤圍而殺之事聞帝震怒褫堂世英職而切責茂華等茂華乃集諸軍分道進討斬首百四十餘級焚死者九百餘人獲孳畜數十羣諸番震恐遠徙來降者七十一族斬送首惡四人生縛以獻者二人輸馬牛羊二百六十稽首謝罪誓不再犯師乃還自丙兔據青海有切盡台吉者河套酋吉能從子俺荅從孫也從

之而西屢掠番人不得志邀俺荅往助俺荅雅欲侵瓦剌乃假迎活佛名擁衆西行疏請授丙兔都督賜金印且開茶市部議不許但稍給以茶俺荅旣抵瓦剌戰敗而還乃移書甘肅守臣乞假道赴烏斯藏守臣不能拒遂越甘肅而南會諸酋於海上番人益遭蹂躪多竄徙至八年春始以活佛言東還而切盡弟火落赤及俺荅庶兒子永邵卜遂留居青海不去其年八月丙兔率衆掠番并掠內地人畜詔絕其市賞俺荅聞之馳書切責乃盡還所掠執獻爲惡者六人自罰牛羊七百帝嘉其父恭順賚之銀幣卽以牛羊賜其部人爲惡者付之自治仍許貢市俺荅益感德而火落赤侵掠番族不休守臣檄切盡台吉約束之亦引罪輸服其時俺荅已卒子黃

台吉襲黃台吉卒子扯力克襲勢輕不能制諸酋十六年九月永邵卜部衆有闌入西寧者副總兵李奎方被酒躍馬而前部衆控鞍欲勦奎拔刀斫之衆遂射奎死部卒馳救之亦多死守臣不能討遣使詰責但獻首惡還人畜而止以故無所憚愈肆侵盜時丙兔及切盡台吉亦皆死丙兔子真相移駐莽刺川火落赤移駐捏工川逼近西寧日蠶食番族番不能支則折而爲寇用扯力克又西行助之其勢益熾十八年六月入舊洮州副總兵李聯芳率三千人禦之盡覆七月復深入大掠河州臨洮渭源總兵官劉承嗣與游擊孟孝臣各將一軍禦之皆敗績游擊李芳等死焉西陲大震事聞命尚書鄭洛出經略洛前督宣大軍撫順義王及忠順夫人有恩